

1 Puis que ma dame de Chanpaigne  
2 Vialt que romans a feire anpraigne,  
3 Je l'anprendrai mout volentiers  
4 Come cil qui est suens antiers  
5 De quanqu'il puet el monde feire  
6 Sanz rien de losange avant treire.  
7 Mes tex s'an poist antremetre  
8 Qui li volsist losenge metre,  
9 Si deïst, et jel tesmoignasse,  
10 Que ce est la dame qui passe  
11 Totes celes qui sont vivanz,  
12 Si con li funs passe les vanz  
13 Qui vante en mai ou en avril.  
14 Par foi, je ne sui mie cil  
15 Qui vuelle losangier sa dame ;  
16 Dirai je : Tant com une jame  
17 Vaut de pailles et de sardines,  
18 Vaut la contesse de reïnes ?  
19 Naie voir ; je n'en dirai rien,  
20 S'est il voirs maleoit gré mien ;  
21 Mes tant dirai ge que mialz oevre  
22 Ses comandemanz an ceste oevre  
23 Que sans ne painne que g'i mete.  
24 Del Chevalier de la Charrete  
25 Comance Crestiens son livre ;  
26 Matiere et san li done et livre  
27 La contesse, et il s'antremet  
28 De panser, que gueres n'i met  
29 Fors sa painne et s'antancion.  
30 Et dit qu'a une Acenssion  
31 Li rois Artus cort tenue ot,  
32 Riche et bele tant con lui plot,  
33 Si riche com a roi estut.  
34 Après mangier ne se remut  
35 Li rois d'antre ses conpaignons ;  
36 Mout ot en la sale barons  
37 Et s'i fu la reïne ansamble ;  
38 Si ot avoec aus, ce me sanble,  
39 Mainte bele dame cortoise,  
40 Bien parlant an lengue françoise,

41 Et Kex qui ot servi as tables  
42 Manjoit avoec les conestables.  
43 La ou Kex seoit au mangier,  
44 Atant ez vos .i. chevalier  
45 Qui vint a cort mout acesmez,  
46 De totes ses armes armez.  
47 Li chevaliers a tel conroi  
48 S'an vint jusque devant le roi  
49 La ou antre ses barons sist ;  
50 Nel salua pas, einz li dist :  
51 "Rois Artus, j'ai en ma prison,  
52 De ta terre et de ta meison,  
53 Chevaliers, dames et puceles.  
54 Mes ne t'an di pas les noveles  
55 Por ce que jes te vuelle randre ;  
56 Ençois te voel dire et aprandre  
57 Que tu n'as force ne avoir  
58 Par quoi tu les puisses avoir ;  
59 Et saches bien qu'ainsi morras  
60 Que ja aidier ne lor porras. "  
61 Li rois respont qu'il li estuet  
62 Sofrir, s'amander ne le puet ;  
63 Mes mout l'an poise durement.  
64 Lors fet li chevaliers sanblant  
65 Qu'aler s'an voelle ; si s'an torne,  
66 Devant le roi plus ne sejourne  
67 Et vient jusqu'a l'uis de la sale ;  
68 Mes les degrez mie n'avale,  
69 Einçois s'areste et dit des la :  
70 "Rois, s'a ta cort chevalier a  
71 Nes .i. an cui tu te fiasse  
72 Que la reïne li osasse  
73 Baillier por mener an ce bois  
74 Après moi, la ou ge m'an vois,  
75 Par un covant l'i atandrai  
76 Que les prisons toz te randrai  
77 Qui sont an prison an ma terre,  
78 Se il la puet vers moi conquerre  
79 Et tant face qu'il l'an ramaint. "  
80 Ce oïrent el palés maint,  
81 S'an fu la corz tote estormie.  
82 La novele en a Kex oïe  
83 Qui avoec les sergenz manjoit ;  
84 Le mangier leit, si vient tot droit